

四庫全書

集部

欽定四庫全書

集部

龍學文集卷一至四

詳校官庶吉士_臣張溥

檢討_臣何思鈞覆勘

總校官降調編修_臣倉聖脉

校對官中書_臣高中

謄錄監生_臣施華

欽定四庫全書

集部三

龍學文集

別集類二宋

提要

臣等謹案龍學文集十六卷宋祖無擇撰無

擇字擇之上蔡人進士高第歷官龍圖閣學

士知通進銀臺司坐事謫忠正軍節度副使

移知信陽軍卒事迹具宋史本傳無擇少從

孫復學經術穆修為文章其著作頗多南渡

後僅存十之二三紹熙三年其曾孫袁州軍
事判官行始哀為十卷取無擇知陝府日歐
陽修餞行詩中右掖文章煥星斗語名之曰
煥斗集又採司馬光梅堯臣等與無擇贈答
之作曰名臣賢士詩文凡一卷又輯無擇叔
祖岳叔起居舍人知制誥士衡弟福建路提
刑無頗等傳記勅書及其姪知普州德恭詩
三首曰家集凡四卷皆附之於後見第十六

卷行所作龍學始末中即此本也惟每卷標
目別題洛陽九老祖龍學文集故永樂大典
焦氏經籍志俱稱龍學集而煥斗之名不顯
其曰洛陽九老者無擇分司西京時與文彥
博等九人為真率會嘗有此稱當時推為盛
事行故特舉之以為重歟集中詩一百二十
三首文四十二首其詩下間注所作時地頗
見詳審如三教圖通堂云龍學時知制誥蔡

州壺仙觀云龍學四月八日遊九老詩云英
宗即位龍學充契丹國信使其咏震山岩彭
徵君釣臺一首下至有紹興己未雷轟石斷
之語詳按詞意蓋出行所訂補非無擇自註
又上安撫張雜端薦孫復牛仲容書註云初
任齊州通判居官十有一月作此書按宋史
無擇傳但紀其舉進士後歷知南康軍而不
言嘗判齊州則更可以補史闕矣無擇為文

峭厲勁折實開風氣之先足與尹洙匹敵雖
流傳者少而掇拾散亡菁華猶不至盡佚至
所附家集中如士衡之西齋話記載宋初故
事多他書所未及亦可以備考据焉乾隆四
十六年十月恭校上

總纂官

臣紀昀
臣陸錫熊
臣孫士毅

總校官

臣陸費墀

--	--	--	--	--	--	--	--

欽定四庫全書

龍學文集卷一

宋 祖無擇 撰

古律十一篇

書高辛氏廟

平昔叙星辰元功祀事分因人列官紀行道亞皇墳高
躅追顓頊徽聲壓放勳淳風今不競帝典世無聞陵古
森喬木祠新際遠氛樵蘇當季運血食屬明君

開寶六年初建

是舊壤資庥廕遺黎薦苾芬春秋奏簫鼓疑是六英文廟

依韻和登州推官張同年之梁山

峻極軋蒼蒼班移自混茫勢臨坤軸斷根入海濤礪屹

立踰千仞孤標冠四荒興雲山近泰出日谷連暘絕景

于斯勝煩襟到此涼山經終寂寂祀典謾煌煌

山海經不載此

山秦祠八神五曰陽即此山也巖黑驪龍睡煙清采鳳翔藏書陋羣玉

中瑟小空桑

室桑山材中琴瑟

禹載無遺跡秦碑有舊章乘輿

曾直上鞭石宛居傍在昔初遷鼎當時異省方縱心師

誕妄恃力逞彊梁儒學微言絕神仙怪說彰錫符尊德
水留識著吾漿豈念思王度惟期至帝鄉齋男何杳杳
秋祝自琅琅詎得三山藥翻同一國狂八神寧爾福二
世果斯亡始禍聞陳涉遺書見子長龍興成大定虎噬
免交攘往事真塗炭寒心劇刺芒自從茲滅國誰復此
祠陽冤毒疑淪髓凋殘競沐瘡鑒宜觀夏后道合慕陶
唐聖世踰三代明君掩百王朝廷隆盛禮簡冊耀休光
運契千齡統歌宣六達莊古今稱治理夷夏共瞻望洪

化周無外羣生洽太康東民休望幸端拱德芬芳

暮秋江上逢端州朱使君詩以申餞

奕葉清芬遠夫君素履恢人皆推世德我亦愛卿材
新命一麾守長途萬里來畫船江雨暗紅旆海風開
服嶺先聲浹編氓美化該此行真邂逅幾日共沿洄
去矣瞻仙棹依然對酒杯前程如見憶為寄早春梅

落星寺南康

金碧共玲瓏樓臺浩渺中雨花僧講盛星石寺基雄
巖

岫廬峯對波瀾蟲澤通微紅看海日遠綠認江楓鷗鳥
機心息潮音梵唱同人間羣玉府寺有太宗皇帝御製御書物外廣
寒宮雲衲蒸多壞塵襟到自空扁舟五湖客長此伴支
公

瀑布廬山

絕巘千尋勢飛泉萬疊痕寒光涵玉岫靈派析琰源峭
壁河流立蒼崖井浪翻猿悲經樹急龍駭落潭渾氣爽
諸峯秀聲和衆籟喧功成身退日期此灌中園

景臣同年郊兄作亭於公居之池上予登而名之曰夢草且賦詩以志焉

新構俯連漪名標謝客詩
憲明溪雨過檻靜竹風吹
賀厦應容燕巢蓮亦許龜
何人倦漂泊此地好追隨
兀兀乘籃輦厭厭倒接羅
秋芳正堪賞樽酒莫過時

題仰山二十韻

維南斗牛下萬仞聳崔嵬
日上光先占江盤勢却回
一方蒙雨露幾處對樓臺
不逐秦鞭去曾經禹載來
雲生

峯慘淡水泮谷喧
砭險外煙嵐變
深中洞府開巖
花春灼爍溪鳥
暖毯毳飛瀑含
清籟乖龍走疾
雷平川蕭廟閼
半腹鄧壇摧精
蘊瑤瑰寶龍鍾
杞梓材僧軒宜
薜荔樵徑怯莓
苔旁晚龍舟橘
前瞻庾嶺梅仙
經饒地肺賦筆
讓天台神物多
靈貺農田少旱
災隱君須獨行
吟咏亦難才何
客能依止伊予
語敢哉一麾成
繫滯四友阻遊
陪未脫紅塵累
徒嗟白髮催夢
頻生枕席賞每
倒樽壘預恐瓜
時代圖歸作醉
媒

陳郡袁陟世弼奉和

客意正索寞詩筒江際來一聞清玉韻如見翠屏開磅
礴雲霄外騰凌鸞鳳迴仙源朝露散乳竇夜風飈九月
已冰霰三時無沴災徒均南畝澤應老鄧林材岌岌聳
天柱巖巖尊國台高名皆禍爾真賞豈然哉紫蓋歆幽
蔓青錢點石苔神虬潛天矯皓鶴舞毳毼采藥蕃芝朮
尋花有杏梅丹臺今窅窅蒼壁古鬼鬼絕頂飛泉落平
崖枯栢摧勢堪卑蔣霍名不假劉雷釋子安生計幽人

足隱媒雲中認旂剡漢上醉觥壘華戶方窮阮籃軒阻
奉陪耳愁塵事入心怯歲華催已作五噫咏元非三傑
才先將丘壑意模寫寄春臺

途次金陵逢同年沈五判官

數載天涯別年來不定居扁舟忽相值孤抱信何如公
幹猶多病

春述

孝先仍懶書

自謂

人生從坎壈客意且躊躇

淡薄市橋酒鮮肥江岸魚可來同飲食勿笑此蕭疎

附

沈遜和詩

卷一
一自曾經別于今歎索居善交思柳惠多病是相如
官下頻無況天涯每得書舊懷長惋嘆此會合踟躕
曉露生蘭苑秋風動鱸魚蕭然林野性與世轉為疎

遊真陽石室

皇祐元年十一月丙申任廣東
提刑日所作有石刻在英州

昔讀到難篇乃聞真陽室亦嘗惟斯人稱道或浮實邈
在數千里莫覲煙霞質青山有獨往吾志久已必如何
騷俗駕尚此紆朝紱謬分南顧憂惟刑在欽恤孤宦雖
云遠勝踐其敢失行行訪雲巖草樹披蒙密呀然一穴

開勢欲吞朝日嵐光屏障展乳溜龍蛇屈溪流自清泚
松韻何蕭瑟酌酒飲遊客謂言此可述周生誠不誣所
紀窮纖悉惜哉非吾土無由寄蓬華平生丘壑心與道
共湮鬱難進而易退終當守儒術

唐周夔作到難篇謂
此祠離長安遠故到

者難
也

龍學文集卷一

欽定四庫全書

龍學文集卷二

宋 祖無擇 撰

七言四韻詩四十四首

和御製賞花釣魚

時為中書舍人

禁籞春深御幄開
鳴鞘曉出五雲來
花含瑞色三危露
酒湛晴光萬壽杯
香餌得魚波滉漾
仙音儀鳳日徘徊
微臣叨竊逢辰幸
持橐甘泉此從陪

九日陪舊叅政蔡侍郎宴潁州西湖

秋晚西湖勝槩多
台軒來此駐鳴珂
沙鷗散去驚絲竹
煙柳低垂間綺羅
亂擲金錢和露菊
狂搖鈿扇倚風荷
下僚幸接曹尊末
率爾翻成擊箸歌

讀王元之後集題於卷末

其集三卷皆出黃州後所作詩

提筆幾回書誥命
剖符長是守方州
未能抗表分司去

五閒詩又題云何當
婚嫁了抗表請分司
終老為郎謫宦休
歌舞嬾呼寒食

節寒食讌郡客詩云歌舞嬾呼
筵上妓飢寒慙見獄中囚
醉吟孤坐月波樓
月波樓詠

詩獨酌詩云孤吟獨酌送殘春坐久樓邊白鳥馴

文章獨步成何事

太宗嘗曰王禹偁文

章獨步異日

垂名不朽 空有離騷寄隱憂

寄獻闕下一二知己

公道當朝絕比倫因憑暖律變孤根
纔衝霰雪遊梁苑便逐風雷化禹門
南郡已甘拋絳帳東州何幸佐朱旂
心懷象魏身江海兩地悠悠欲斷魂

歷城郡治凝波亭

齊州

耽耽層構俯清漣山色波光曉共鮮
形勝增雄齊十二

風流素盛客三千鋪舒柳影眠鷗渚欺壓蓮香載妓船
公退每來須度日塵纓未濯媿潺湲

留題泰山孫明復先生新居

築室新成日觀前亂雲重疊稱高眠人逢捫蝨驚旁若
衆望乘駒詠賁然名理靜談誰捉麈古書閒校自磨鉛
行聞天子東巡狩羽葆親臨此禮賢

試筆

濟南通守欲經年最課無成媿古賢却為簿書拋筆硯

每思樵釣負林泉，浮名自信雖徒爾。
薄俸相拘且勉旃，已共妻孥約生計。
會須搔首賦歸田。

監丞蕭君見貽嘉句，仍惠芳醪，強率鄙詞，輒繼高韻，聊資道爾，深媿斐然。

遲日和風婉婉春，感時情思浩無津。
憑君遠寄中山酒，顧我方為洛社人。
濡筆便思題素扇，當尊誰借吐芳茵。
已欽才妙兼懷惠，相遇文場願捧輪。

寄泰山孫復

即明復也

先生心與白雲閑五十秋風鬢不斑自有清名滿天下
更無塵跡到人間朱鉛樂外非攸好貪懦聞風合厚顏
不待高吟見招隱見收餘俸買青山

蕭五監丞新作堂成名曰知雄且賦彫章題之
屋壁勉率蕪惡以繼高韻

況堂佳號塵游外題壁新吟藻思春朴素自持師老氏
清醒常戒鑒靈均窮通一致由知命恬智相湏合入神
因覽君詩我顏厚不能假日樂天真

贈牛仲容

吾君盱食念邊陲天下英雄待聘時
仁義未行真處士功名不立豈男兒
卧龍誰識南陽隱失馬何勞北叟悲
生嘗來薦濟南不利莫向林泉賦長往
秋風吹子鬢毛衰

張寺丞鳴玉亭書事

為憐瀟灑近城闌來往何曾問主人
列岫曉昏雲郁郁流泉秋淨石粼粼
陸機詩就休招隱班固文成正答賓
愁見西峯日將暮却驅羸馬入埃塵

庚辰清明州衙不送新火

禁烟故事存遺俗改火平時有舊章
縱道齊民皆按堵堪驚烜氏昧修方
晨炊已絕供賓饌卯飲難溫獨酌觴
不似前年為客日當鄰猶許借餘光

赴任南康將經九江游二林先寄交代關屯田
平生山水有心期今得軍麾慰所思
我欲因行訪蓮社君應未訝過瓜時
若逢勝槩終朝住兼領閑僧到處隨
莫遣迎新吏人至雲間泉畔不相宜

送交代闕屯田赴闕

謝公雅尚廉侯政兼得如君不可加
自有袴襦歌道路長驅旌旆訪烟霞
林僧解誦松牕句廳吏能封竹檻花
今日北轅堪健羨清風留與後人誇

琵琶亭

晚泊湓江半客舟琵琶亭下動閒愁
霓裳綠腰杳何許楓葉荻花空自秋
賈傅有才悲鵬鳥楚騷終古怨靈修
莫言司馬青衫濕今日行人亦涕流

南康春日

慙愧東風破臘來一樽清聖為君開無方可使朱顏駐
有客相逢白眼迴老大漸能知世態疎慵那復計身媒
遙憐伊洛水應泮芳草還荒舊釣臺

簡寂觀

觀即陸靜修先生所居
名即先生之諡號焉

順風曾屈帝王尊身後高名與觀存石室深居廣成子
布囊薄葬楊王孫流塵冪冪凝丹竈清吹徐徐觸絳旂
牢落空山門晝掩羽人亦說絕囂煩

梁沈旋碑云止煩
曰簡遠囂在寂即

義表
名也

右軍墨池

匡廬峯下歸宗寺曾是當年內史居繭紙世傳遺迹後
墨池人記作書初秋毫幾老崇山兔舊法空觀得水魚
筆勢圖云先取崇山絕谷中兔毛八九月取之又珍重
用筆法云送脚似遊魚得水合頭若景山興雲也

僧家能好事朱闌碧甃壯庭除

清明日與二三賓客賞花陳判官為推勘他州
事不預是會以詩抵予因次其韻酬之

寒食春光正好誇小筵應免負芳華清談且喜交揮麈
賭酒何須要畫蛇潑大雨餘微綠潤落花風急亂紅斜
幕中有客應惆悵今日全輸太守家

秋日天平驛書事

孤館無人慰寂寥感時情抱楚旌搖縱橫著物秋聲起
早晚遠空殺氣消衰鬢已同潘騎省壯心猶羨霍嫖姚
誓江義勇吾家事不得提戈靜殺妖

濟上夜泊寄杜秘校

十幅蒲帆一竹篙隨流逐浪我心勞幾程烟水秋光遠
半夜星河天氣高正想黃陂何淼淼可憐禹瀆更滔滔
猶欣明發諧相見願奉清言散鬱陶

經劍池

皇祐元年八月晦日題時以
秘書丞為廣東提刑經過

巧冶何年百煉金荆鐘芒刃此湮沉氣衝牛斗雖難掩
鑒遇張雷始見尋恍惚莫窮神物遠波瀾空在曲池深
鉛刀也強思磨拭悵望西山與華陰

送春長句呈李泰伯

時在
袁州

盡日臨風把酒卮宜春臺上送春歸已看綠樹陰陰靜
猶有殘花帖帖飛歲月任從隨手過功名未必與心違
我緣客宦無常處後會如今亦恐稀

送潘華陽

河陽苗裔有英翹年少聲名動帝朝月桂我欣同賜第
澗松人借此沉僚金牛開道秦川險竿馬來賓漢使遙
想到刀州遇知己便從平地上煙霄

微子廟

億兆夷人困獨夫惟君先見得良圖為仁始欲扶商祚
去國終能啟宋都鉄鎖豈甘因諫死髡鉗仍免作官奴
千年廟食應無愧知退知亡即聖徒

寺有四絕一曰靈巖予以赴官獲此稅鞅因賦
拙句用誌其行

常想靈蹤得到難因回征轡此盤桓松風逗磬僧齋冷
石水環堂客夢寒聖作自同堯典布

寺有偃蓋松白鶴泉及藏太宗皇帝

御製古碑猶是魏朝刊最憐山色當樓好欲去重來一

凭欄

贈商水連尉同年

場屋相知最有情，去年同試便同榮。
神仙名籍輸梅福，典冊文章滯馬卿。
泣玉淚收休積恨，擲金詞在藹新聲。
公卿好致歸臺閣，莫遣徒勞浩嘆生。

次韻和酬張旒秀才見寄

傾蓋相知分不同，遠憑郵置枉緘封。
題評祇益更頭品，刻畫何曾補陋容。
綵服侍行君得意，朱轡假守我勞悰。

予方權領郡事論文未遂西齋約早晚重親太錫鋒

明水鎮水陸禪院

誰卜精藍若畫屏四邊山色與泉聲野僧慣見心應樂
俗客偷來骨亦清晚吹乍回香篆破曉雲纔散蠟燈明
吏人莫怪徘徊久自得閒情減宦情

龍圖范給事以禪服向除修治瑩域就山築室
因爾書懷俾無擇繼和謹次用其韻

采采陔蘭負養親幾思定省泣晨昏三年已畢先王制

晝日將承聖主恩名遂自同周柱史諫違誰記魯臧孫
考槃在澗雖云樂祗恐泥書到遠村

田四秘丞通判鎮戎軍

身紆萬綬朝章貴手把芝函帝命新方朔上書曾自薦

祁奚外舉果知人

公前年應運籌決勝科今為侍讀李侍郎保任被召試策入等遂領此命

時西北用兵

運籌暫逐征西將持橐看歸拱北辰我亦潛心

禦戎策羨君抗旆擁朱輪

官況

物態無端固盡諳自為俗吏欠清譚豈憂官况全蕭索
祇畏人言足二三玉勒已辜尋曉陌錦鱗猶憶釣秋潭
公餘自遂疎慵性從道嵇康七不堪

哭鄆州孔給事二首

出入多年侍紫宸封章頻上觸龍鱗杼投幾見疑慈母
檻折終聞記直臣闕里忽驚歌曳杖洛陽那復見埋輪
師門一慟盈襟淚痛為明時惜正人

聖孫家世嗣衣纓夫子當朝有令名許國志堅存亮直

金史卷之二十一
致君心切贊隆平明廷抗疏忠言在列郡班條惠化行
不享永年兼大用終天遺恨負蒼生

夏州叛

羌寇奸誅軫聖憂出師十萬擁貔貅朝廷命將詩書府
廊廟論兵帷幄籌舜后舜干期振旅漢臣投筆待封侯
宣王六月存周雅願繼徽聲頌國猷

寄澶州孫司理

明道二年同夏課四人兩舉盡登科孤寒惟子辛勤甚

虛薄伊余忝竊多官路驅馳今各自名場出處舊相過
感今懷舊無聊賴不覺臨風發浩歌

送孟湘虞部赴闕

科名拾芥職三虞落落雄才與衆殊為政人驚今遂霸
論兵自比古孫吳倚廬已見因心著公近居先大夫
憂哀毀過制結綬還陪辨色趨不似馮唐空白首漢皇今正渴嘉謨

送劉進士遊邊

朔風動地雪花明去去從知指戍城
場藿未縻千里驂

食魚翻嗜五侯鯖狂途望斷河水合旅館吟殘海月生
且共淹留話離索一尊濁酒為君傾

同年楊兄作尉楚道兼領勾稽之任賦七言四
韻詩以送之

縣城荒僻民居少吏事全稀似隱淪且喜桑郊接鄉樹
莫嗟藍綬染京塵鸞姿豈合淹仇覽仙骨應難滯子真
好在公餘頻寄問我方江上學垂綸

宋嘉言雅善飛白一日書八字貺予因成長句

謝之

輕如游霧重如雲學到精微妙入神竒迹昔年傳堊帚
高名他日壓烏巾誇呈明友防求副留教兒孫恐失真
天子清閒好揮翰似君須合侍嚴宸

送韓尉員外

幾年獻賦向公車四十方為冉冉趨昔競寸陰終蹭蹬
今貪斗粟尚踟躕潘郎毛鬢看將白陶令田園說已蕪
官滿還歸省門下預應搔首重長吁

題魏野園 陝府

曉日東郊扣隱扉
瞳瞳初日弄朱旗
黃梢風舞先生柳

紫頰霜殷

烏閑切赤黑色也
左傳云左輪朱殷

大谷梨粉艷清歌
穿邃閣

碧溪寒韻落幽池
我來載酒山翁醉
且喜秋香菊滿籬

誚王安石乞分司西京避讒而去因以述懷

割斷攀緣宰相權
憂危爭似我身全
試觀竿上拋生體
且擬波中戲釣船
名利不求還獨樂
是非莫辯祇高眠
何當對景幽堂坐
更得閑吟度百年

龍學文集卷二

欽定四庫全書

龍學文集卷三

宋 祖無擇 撰

五言四韻詩四十二首

題三教圓通堂

其堂在蔡州開元寺
內龍學時知制誥

師本佛之徒潛心老與儒一堂何所像三教此焉俱香
火長相續丹青久不渝高賢旌好事二記聳龜趺

馬上讀韓吏部集

金史卷之二十二
卷三
驅羸勸遠征尺箠亦慵擎却得開編看仍教縱轡行儒
推文暢行詩許孟郊鳴盡日既遺味渾如挹太羹

至齊五月兩院獄空喜而成咏

厭預鈴齋議欣聞獄犴空王章用舊制五月紹遺風止
繫垂衣治非干別駕功惟期四海內刑措與周同

行役于清偶書四韻寄示幕中賓客

經旬一水湄風土化縑衣豈敢嗟于役何當賦式微雲
山晴特秀花木暖相輝期子同攜手春游事勿違

齋中即書事

南事

軍壘無多事
朝晡且放衙
吏人如野鹿
公署似僧家
京信因求藥
賓歡為鬪茶
忘懷塵俗外
枕藉祇南華

匡先生廟

先生高世跡
舊隱白雲深
結宇知何代
遺祠直至今
地分壇杏影
門接社蓮陰
我亦希風者
終朝託玉岑

贈廬山崇勝珂長老

珂也僧中秀
曹溪得祖衣
雲泉聊適往
鉅錫遂忘歸
九

月秋風老千山暮雨霏我來陪靜話相對兩無機

送承澤上人歸寧富沙

五老峯前見過從一歲餘還將隨客棹歸去侍親興乞
食江雲際牽吟臘雪初祇應清夜夢時復到荒廬

酬江西運使齊工部見寄

龍坂彌年別長茲仰道風夢曾瞻使節喜忽得詩筒詞
藻春林秀恩私地鎮崇因將示知者傳誦滿江東

游韶石

純音何寂寞秀色自崔嵬
岩草遺簫在溪禽學鳳來
余希探禹穴人似畏軒臺
登眺秋風裏煩襟盡日開

史隱宜春郡詩十首

其一

吏隱宜春郡年豐獄訟稀
餘糧委南畝茂草滿園扉
天意憐艱食民心恥畫衣
萬家行樂處車馬有光輝

其二

吏隱宜春郡溪山若畫圖
纖鱗時自躍幽鳥靜相呼
曉

浪噴寒雨晴嵐鎖綠蕪漁樵本吾事搔首重踟躕

其三

吏隱宜春郡追惟二相賢

房瑄李德裕

節明天寶日業茂會

昌年友善曾何累朋誣亦自煎

瑄坐與李適之韋堅等善貶宜春太守德裕為

王璠李漢等所誣貶為宜春長吏

不才非不幸異代若差肩

其四

吏隱宜春郡閑思應舉時端居苦貧賤徒步入京師誤
寵乘軒鶴均憂入廟犧功名在何許雙鬢已垂絲

其五

吏隱宜春郡鄉園去路賒
間闕成客宦荏苒度年華
出水魚吞餌辭山鳳在笄
誰言千里隔夜夜夢吾家

其六

吏隱宜春郡同僚得俊髦
純音等疏越餘刃劇豪曹
器識青雲遠歌詞白雪高
遂令遷客意不復賦離騷

其七

吏隱宜春郡山城少客過
靜中窺物理閒外養天和
春

暖尋花塢宵涼翫月波將迎者誰子勞逸兩如何

其八

吏隱宜春郡放懷詩酒間未能慙下俚幾欲效中山杜

甫藩籬窄

元稹論杜李之優劣云李尚不能歷其藩籬況堂與乎

劉伶幕帝慳高

吟與沉醉榮辱詎相關

其九

吏隱宜春郡窮通嬾更占矜名遭巧譖晦跡喜深潛昔
慕狂為聖今師智養恬優游無一事不覺歲時淹

其十

吏隱宜春郡素飡誠有餘政聲慙遂霸文藻謝嚴徐使
節分銅虎仙廬秘石渠君恩殊未報不敢賦歸歟

題紀信廟

漢祖臨危日將軍獨奪功一身雖是詐萬古盡言忠樹
老風聲澀天寒景色空我來觀廟貌無語對村翁

昇州保寧寺鳳凰亭

鳳臺雖舊址亭榭斬新開荆棘榛蕪去江山氣象來明

君虞氏化賢守次公才遲爾離丹穴飛飛止此臺

時龍圖葉

起居鎮
金陵

留題女郎臺

女郎臺上寺寺影蘸湖光夜梵星辰近晨齋鳥雀忙煙
滋楊柳綠風送芰荷香欲下還慵上憑欄到夕陽

春郊即事

東方驅曉騎南畝勸春耕試與牧童語因知林鳥名雨
前茶正小社後酒猶清可笑豚蹄祝篝車望豈輕

送李承知京兆司錄

纔從知己薦

公近以知己特薦改官

又應辟書行

今知府天章孫待制辟公領是

任廷尉官聯重軍謀職任清華嚴東野秀紫閣晚峯橫
盡是供吟處歸應新集成

送宋寺丞通判邛州

半刺侯藩重臨邛驛路賒將經灞陵樹先看洛陽花土
物張竊竹民風卓氏家為君傷遠目日日斷衰斜

秋日感懷

多病多愁客新秋百感生異鄉違土性孤宦見人情案
厭留燈讀田思帶雨耕不堪臨曉鑑潘鬢一毛成

寄潁州兄

川陸一千里炎涼六十旬意通書信少思入夢魂頻身
外宦情薄眼前人事新祝兄無見念憂道不憂貧

舟次張澤阻風

舟楫雖佳興風波即畏途我心何所懼世路此無殊銜
尾千艘泊爭頭萬怪趨颼然不終日揮手謝淳洿

寄題漢州西湖兼簡知郡馬屯田

房相昔遺愛清風湖水長人思浴池鳳誰識濟川航白

雪徽音遠

太尉善於彈琴

洪鈞道化光還聞繼高躅新有召公

崇

寄千乘劉殿丞求字人編

千乘劉夫子高名繼謫仙從居庇身邑已著字人編才
入鍾嶸品文期鄭氏箋何當求副本長願播匏弦

寄信安判官張秘校

蓮幕從軍客蓬仙與校人才華過鮑謝交契敵雷陳婉
婉謀畫暇翩翩書問頻徒知感高義猶阻奉清塵

泗水

紀地復涵虛清疑灝氣俱東家遺教遠夏后建功殊冷
色平吞魯長波迴勝吳

關二句

沈康赴江西掾

高譽冠時英人皆倒屣迎決科材尚屈掌獄職仍輕滕
閣吟登健吳山醉望清公餘如訪古一為問豐城

張唐民下第東歸

學古功非淺，干時命尚迤。
拾青韋壯志，垂白念慈親。
歸路天同遠，生涯世自貧。
吾知君道闕，

送人作尉臨潼

年少文能老，新曾射策來。
從橫傳古學，慷慨濟時才。
黃綬官徒爾，青雲志在哉。
他年歸會課，遲子出塵埃。

書懷寄呈萊州張學士

從作東齊吏，經年寡往來。
朱顏隨日減，青眼為山開。
學

政慙能政論材信不材何人慰孤寂知已在蓬萊

累辱書問

兼貺詩
筆故云

萬太博知惠州

惠州君未到聽我送君吟去路九韶石鄰封八桂林下
車秋色老望闕海雲深善政多餘暇無忘惠好音

送新州陳式虞部

大庾嶺南郡新興事若何還珠合浦近辟惡蜜香多主
聖天如覆時平海不波更逢賢太守應有袴襦歌

送蓮房與馬屯田

問遺不必貴要之資闕如蓮房三百枚采掇亦云初持
以侑尊酒甘香即有餘野老獻芹意今予其有諸

題安成劉伯玉日新亭

積善家餘慶日新亭可云詩書盈几有道藝喜時聞兒
姪既登學晨昏在克勤欲知榮地力此便是青雲

寄成都詩人謝希濤

常聞游蜀客來說謝希濤氣稟江山秀名因翰墨高新

詩來句遠去歲得詩三十首密意念空勞拙句聊相贈應頻報

錯刀

龍學文集卷三

欽定四庫全書

龍學文集卷四

宋 祖無擇 撰

絕句詩二十六首

秋曉寓目

梧桐冷墜春宮井
沆瀣光浮漢苑盤
倚柱遠天垂六幕
照梁初日上三竿

鴛鴦

水宿雲飛無定期雄雌兩兩鎮相隨到頭不會天何意
却使人生有別離

後池新柳

客來莫怪寡心情俗吏喧嘩不喜聽多感後池楊柳眼
一回相對一回青

歷城春日對酒

數尺游絲拂面來數枝紅杏向人開眼前信美非吾土
且勸春風酒一杯

戲別申申堂

翠柳和煙籠碧
沼紅芳如火照
諸鄰主公欲去
寧無戀倚翠偎
紅屬後人

汴水即事

波狂如箭雨如絲
汎汎扁舟瞥鳥飛
睡起嘔啞且鳴櫓
却思村舍聽鄰機

澄清閣

在楚州

范滂雅志在澄清
今日廉卓命閣名
華榜高標雖具美

奈何長是困蒼生

贈江州李虛一司戶

官況蕭條三語掾地居卑濕九江城曾聞午夜開宣室
早晚君王召賈生

劉仙石

在江州太平興國觀

神仙不死石長存萬古千秋表洞門人欲求真好修煉
莫徒將杖叩苔痕

又

支機莫問君平肆取履誰修黃石祠
深洞自開人不見
何須惆悵憶當時

交代屯田遠惠書問紙尾批示若就江州至軍
兼可腹背游覽廬阜因成拙句且答佳意

廬山在境好行春猶恨奇峯半屬鄰
腹背徧遊煩示諭
即當先謁樂天真

將至南康道中

湓江輟棹整驂駢松路揚鞭入翠微
好是近郊人候望

紛紛羽服與田衣

招二三僚友游廬阜

雨餘廬阜連天碧
公退鈴齋盡日間
為報二三佳客道
速須蠟屐共登山

遊栖賢

偷得沉迷簿領身
暫來林下訪幽人
雲泉滿眼慵歸去
便擬拋官學隱淪

歌者李蘓蘓

齊州

歌妙纍纍若貫珠歷城惟祗數蘓蘓何當更唱陽春曲
為爾今宵倒玉壺

過渦河

揚鞭策羸馬橋上一裴回欲擬臨渦賦慙無八斗才

昔曹

子建臨渦作賦書于鞭上

馬上口占

前年躡屩念歸歟今日乘軒類使乎千里班春憂寄重
自慙翻屬箇非夫

登泰山簡周行

日日塵中眼不開
暫登蒼翠喜游陪
莫辭辛苦經難險
大有人生不到來

又游靈巖

紅塵滿馬三回到
青嶂迎人萬疊開
却被野僧相顧笑
區區還是舊時來

次韻酬陳判官見貽

一篇為惠枉瑤封
疑得仙文自蕊宮
始信夫君才力大

居然天地入形籠

周成職方笑臺

賈生太息唐衢哭感事傷時可奈何
似君當堯舜日臺頭大笑樂天和

感事

東家木鐸德音遠西竺金人像教來
禮樂不興王道絕吾民何日遂康哉

題蔡州壺仙觀

龍學四月八日遊蔡人每歲于是日來集此歡賞遊歌其觀在

城北十里許有仙榆
數十株亦名大木觀

鷺老花殘過禁煙杖藜閒步到壺僊
僊家本是無塵地

別有風光一洞天

費長房懸壺之地

聚為九老自詠

龍學因分司西京御史臺與司馬溫公九人

為真率會謂之九老

科名高厭玉堦前歷任公卿四十年休道老夫無事業

兩扶紅日上青天

英宗皇帝即位龍學充皇帝即位契丹皇太后國信使神宗皇帝即位是


時龍學為開
封府大尹

題蔡州東湖

夕陽水底霞鋪錦
清夜波心月湧金
此是東湖最佳處
無人來伴水仙吟

詠繭兒

千絲萬縷自經營
本為藏身却誤身
待得巧成歸鼎鑊
不知輕煖屬他人



龍學文集卷四

欽定四庫全書

集部

龍學文集卷

五至九

詳校官庶吉士

臣張溥

檢討_臣何思鈞覆勘

總校官降調編修

臣

倉聖脉

校對官中書

臣高

中

膳錄監生

臣施

華

欽定四庫全書

龍學文集卷五

宋 祖無擇 撰

唱和詩一十五首

歐陽修永叔送龍學赴陝府酌飲贈別

明日君當千里行
今朝始共一樽酒
豈惟明日難重持
試思此會何嘗有
京師九衢十二門
車馬煌煌事奔走
花開誰得屢相過
盞到莫辭頻舉手
歡情落寞酒量減

置我不須論
老朽奈何公
等氣方豪雲
夢正當吞八
九
擇之聲名重
當世少也多
奇晚方偶西
州政事藹風
謠
右掖文章煥
星斗待君歸
日我何為手
把鋤犁汝陰
叟

龍學次韻和

前日西行別翰林
為我開尊飲之酒
高冠滿坐皆賢豪
談笑喧呼時各有
自慙流落疏游陪
十載江湖成浪走
主人名重聞四夷
典冊高文推大手
發揮六藝無遺精
攷黜百家如拉朽
顧我昏冥聞道晚
代謝春秋四十九

當年擊節傲金注此日強顏同木偶事功未省成尺寸
廩祿惟思校升斗會須歸去老東陂鼓腹含飴逐堯叟

吳奎長文和

陝郡太守來告別翰林主人為置酒急喚尋常詩酒伴
要誇此會為難有席間騁辯何快哉恰似縱九臨坂走
詭譎往往笑絕倒同異時時瞋掉手共憐奇偉出塵冥
却欲昏愚浪枯朽從來豪舉必兼包擊節齊侯容九九
我實鄙鈍不曉事賢公采取寧非偶擇之文行衆所珍

昔日乘槎犯牛斗年將老矣又分符莫遣安排用莊叟
劉敞原夫和

驪駒在門且勿宣主人留客姑進酒一時轉盼已陳跡
千里相望更何有祖侯聲名二十年天下英豪共奔走
誰云白髮寄郎曹更喜朱轡入吾手揚雄天祿就寂寞
召伯甘棠變枯朽乃知人事不如意自古十常有八九
男兒何曾計出處時運由來有奇偶莫嫌青雲曉著鞭
會取黃金大如斗君能日飲和天倪餘事無何付北叟

范鎮景仁和

史君分陝惜別難
緩聽長吟速行酒
荆山北面黃河南
千里封疆為已有
往來無窮西復東
袞袞輪蹄利名走
甘棠雖云勿剪伐
未必從前不傷手
當時遺愛安在哉
賴有聲詩傳不朽
擇之才刃如新硎
歷年何啻十有九
胷中蘊蓄富術業
此行直欲古人偶
近世只知厨傳為
不顧虛名似箕斗
寄言道路如采詩
但問樵夫與田叟
江休復鄰幾和

西掖門外駐征軒修書院中傾別酒諸公磊落方具來
顧我衰遲亦何有祖侯銜使才北歸亟請甘棠復西走
函關候吏齊引領翰林主人惜分手高談抵掌華屋頭
賦咏題詩樂難朽飛觴舉白至無算擊楫誓清不殲九
着鞭壯士寧後時隱几先生仍喪偶擇之去冬悼亡定國能飲
動論石山公雅望潛增斗紛紛醉袂影就判怊悵高陽
一狂叟

梅堯臣聖俞和

古人相送贈以言今人相送舉以酒酒行慙慙意豈疎
酒能躊躇悲更有行當何之來者誰陝州兵吏爭迎走
壺漿往往過函關翰林惜別方攜手自言老夫遇知難
願得公詩為不朽公因索筆作長謠落落寓言誠十九
我慙竹管廁宮懸縱合律度應亦偶太守西行已不貧
忽獲明珠盈大斗歸立螭頭未是遲暫向棠陰問遺叟

龍學題袁州東湖盧肇石

袁山之陽秀水側草覆遺基誰氏宅皆云子發其姓盧

往以文章名籍籍宅中舊物何所存惟有嶙峋一區石
濶纔三尺高倍尋久卧塵沙羣瓦礫余心好異因獨往
下馬環觀聊拂拭地表可見十二三已足怪駭動魂魄
呼工運挿塹其旁挽以長絙百夫力雜然鼓譟登大車
恍爾如蒙巨靈劈選置東湖最佳處四面澄波映天碧
倚空突兀無與隣頓覺亭臺增氣色彎環幽竇莫敢擅
恐有牛龍飛霹靂余嘗南游到陽朔衆峯矗矗春筍植
捫蘿踏蘚窮之遍若此奇車曾未識郡人奔走未知雲

故老驚視復唧唧乃言此石遇真賞屈指于今年二百
沉埋曠代誰爾珍一日光價逾荆璧嗟余束髮大夫後
區區志尚惟孤直十年再謫非不窘猶慕聖純無改易
如何故老不我愚感物再三形嘆息石不能言人有言
勿使他時重湮阨

宛陵梅堯臣聖俞和都官郎中胡公疎示擇之
盧石詩因和之

袁州太守蓬山客來過盧家尋怪石盧家百物今已空

唯石難移留舊蹟埋沒尚存三四分雨淋日炙如皴皴
太守惻然呼健兒荷鋤秉耒爭來役健兒掘土不為堅
旋旋剝沙見圭隙漸奇漸異人忘勞更索更深知幾尺
高峯削出嵩華骨虛竅鑿破蛟螭額千指曳繩亞四輪
擊鼓助力歸東陌東頭河水深谷傍黃沙洗盡何蒼碧
故宅愈冷東湖喧貴賤競觀無礙隔太守自憐堅直心
愛少憎多屢遭謫南至蒼梧及桂林名山徧訪無窮僻
所宜厭慣不入眼向此孤吟尤愛惜我思永叔滁陽時

大誇古翠菱溪獲作詩遠寄子與蘓高唱相隨無節伯
今知賢人趣向同玩好托情無俗格建康從事胡公球
一見夫君如李白雄才落筆瀉天河綴韻孤清仍險窄
入探龍穴誰為難辭通造化方能敵殿後吾雖膽力强
獨鞭疲馬終無益

樂安任大中和

宜陽刺史才祖擇之維傑太旱雨一方盡使焦枯活公
退趣尚深水石探其絕長江北岸林唐有盧子發曾居

此林下高把簪組脫歲遠成荒墟佳名詎泯沒有石數
尺長猶是舊時物况辱泥塗久實有堅重節擇之渡水
見力為心慘切萬夫一呼聚撓動雷聲揭地險若驅來
巖谷俱震裂幽輔郡東河脫得太華骨白玉漏纖紋雨
頻為藻刷草蔓漸盤遶柳綠密揮拂潤恐欲迸泉怪亦
有與穴安知無蟄龍時見微雲出幾因掌夜吟簾曉捲
殘月氣暗逼人寒蒙寵未苦別烟重風掃開獨立勢突
兀蘓武見單于傲睨腰不折人皆盡將歸予筆恨麤拙

擇之豈不賢天涯避讒舌對此憂足忘我觀未甚悅不
得見媯皇願天無破缺

廣陵蕭元宗和

石是人非世所傳宜陽城郭古山川和光瓦礫曾無累
委質泥沙積有年地僻久為神物護時來方遇使君賢
介然作鎮東湖上德政何當向此鐫

盱江李泰伯題袁州東湖樂游堂呈龍學

古郡城池已枕江東湖更在郡東方水仙座下魚鱗赤

龍女門前橘樹香路絕塵埃非洒掃地無風雨亦清涼
使君待客多娛樂只有醒時覺異鄉

又題袁州宜春臺再呈龍學

謫官誰住小蓬萊惟有宜春有古臺千里待看臺末去
萬家攢作畫圖來雲中羅綺香風落月底笙歌醉夢回
莫怪江山若相助騷人沒後得真才

龍學和題東湖

晴烟暮靄淡湖光勢勝居然占一方拂水萬絲楊柳弱

倚風千蓋芰荷香
縱遊閒泛蘭舟
穩半醉在眠石
席涼
公退每來湏度日
却疑身出利名鄉

又和題宜春臺

異鄉何處散幽懷
賴得城中百尺臺
還向天涯經歲住
那知春色為誰來
雪消江上看梅發
風暖衡陽有雁回
強擬登高聊賦詠
再三愧乏楚人才

龍學文集卷五

欽定四庫全書

龍學文集卷六

宋 祖無擇 撰

唱和詩三十九首

題尚書余襄公西園

尚書余靖在韶州居龍學時為廣南東路轉運使

臺閣清風正凜然歸休車騎曲江邊及親已具三牲養
負郭新添二頃田萊子長年榮綵服衛公雅意樂平泉
官閒道在心無悶惟惜光陰事簡編

尚書余襄公靖謝都運擇之見訪西園

初聞結廬訪幽齋拂曙呼僮掃綠苔方愧蓬蒿開徑晚
已驚騶馭過江來林間載酒情偏願門外回舟事可咍
交泰于今易離合感君篤舊重徘徊

題余尚書山居要術

張衡已作歸田賦汜勝仍修種樹書願借山居精要術
欲將嵩洛葺吾廬

尚書余襄公答都運擇之借山居要術

經濟諒周當世務收藏敢秘老農書相逢莫羨山居好
歸去蓬山有直廬

袁州慶豐堂十閒詠

皇祐五年十月二十一日

其一

吏散鈴齋掩閒眠到日斜無端是春夢容易繞京華

其二

鄭聲良可厭閒抱七絃琴欲識調絃意理人先理心

其三

年長身多病閒抄已試方未甘先犬馬畢命報恩光

其四

青山日相對閒看白雲生誰謂無心出中含濟物情

其五

曉按三杯後閒烹北苑茶色香俱絕品雪泛滿甌花

其六

扁舟賓客少閒作道家裝跡靜心還靜逍遙覺日長

其七

雨霽輕埃息閒吟面曲池遊鱗時對擲雙破碧連漪

其八

朝來因試筆閒答故交書莫怪音塵絕吾心與世疎

其九

漸老無功業閒思惜壯年桑榆如有得猶可勒燕然

其十

晴軒足清趣閒與鶴開籠寄語北山侶無驚蕙帳空

袁州通判陳詵和十首

其一

時豐公事少筆硯任橫斜環郭江山秀人情等物華

其二

有象堦前景無聲膝上琴何勞今鄭衛視聽不關心

其三

窮谷寓形久慚無問俗方文章古刺史

謂韓退之

今昔竊餘

光

其四

穢草誅還密浮萍去又生
輒污如鑑淨有客若為情

其五

秀泉開舊甃初試仰山茶
寂寂有餘意池蓮三五花

其六

園沙日成趣窮詩嬾綴裝
梁間冰雪句屈指歲華長

其七

洗竹遙山出流泉到曲池
可憐波萬頃龜兔對淪漪

其八

道院今猶古閒中事可書鷺鷥馴不去誰可得親疎

其九

登堂方再月已許慶豐年偶繼前賢跡承流頗裕然

其十

鴻鵠遠矧弋魚鳥脫池籠始覺一無物方知萬事空

江西運使閻珣謝擇之學士惠示吏隱宜春郡

十詩因成五十六言奉答

達觀終知世事勞利名都是一鴻毛登瀛自有仙遊樂

緩帶何妨吏隱高
深意庇民躋富壽
正辭華國聳英髦
搏風九萬期鵬翼
且傲松軒弄彩毫

龍學和閻運使以詩見獎吏隱宜春郡詩

狂吟何足詬風騷
和寡甘降郢唱高
敢望與言同子夏
競推多可似山濤
九成豈後虞韶美
一字終虛魯史褒
自笑潢汙不盈尺
猶將學海去滔滔

李泰伯送春絕句一首呈龍學

時在袁州

宜春臺上送春歸
淚滴金盃不自知
懊惱黃鶯解言語

飛來惟見落花枝

龍學和

九十日春今日盡送春何況我偏知後期應在經殘臘
重探梅開雪裏枝

盱江李泰伯送春絕句二首寄呈龍學

去年春盡在宜春醉送東風淚滿巾今日春歸倍惆悵
相逢不是去年人

又

東君此去幾時來雪裏梅根待暖迴莫似仙家寥落甚
蟠桃千歲始重開

龍學和

憶時相逢甲午年與君同賦送春篇等閒又見春風老
更捧新吟一惘然

又和

萬樹紅芳落漸稀浮榮能得幾多時孤根未識陽和力
春去春來兩不知

龍學九日登袁州宜春臺

落帽佳辰又到來
黃花爛漫為誰開
已經多歲衰容改
更被無情急景催
取次杯盤湏盡醉
隨宜歌管任頻陪
却慚未報君恩厚
空向山城養不才

是日招郡庠職事同登宜春臺兼賦詩鄉貢進士直學宋攄和

登高佳節喜重來
會客依隨五馬開
帽落秋風隨意適
杯迎露菊趁時催
東籬幸有主人席
絳帳那逢上客陪

時李泰伯預也

欲報君恩話歸去不妨尊酒論文才

鄉貢進士教諭羅誘和

九日經年一再來不妨吏隱遣懷開時豐訟少欣多暇
秋晚花黃儘任催幸遇登高賢燕樂喜容落帽徧追陪
預愁詔入三公去芹泮誰思樂育才

詠震山巖彭徵君釣臺

彭構雲宜春人力學多通尤善講易陰陽
圖緯無不精究注通元真經辭理深遠世

所推重隱居不求聞達唐天寶中刺史李
璟以其名聞上遣使者齊延邱以蒲輪徵
之凡三往始至玄宗欲官之徵君辭焉堅
乞歸鄉上元元年六月卒年六十三塋東
原有釣臺在震山之前本朝皇祐五年九
月二十日休暇龍學與郡僚遊震山巖因
以詠之震山離州東十里釣臺本一巨石
紹興己未季春雷轟石斷

間作山城吏隱居
敬君真逸寓漁磯
臺前岩畔清風在
尚想煙波映芟衣

通判陳旸和

東有徵君真逸居
有臺可釣傍漁磯
志高不在魚并餌
回笑滎陽血染衣

京兆章友直和

巖因更號震山居
臺上猶存舊釣磯
一派滄浪真隱處
澄清尚有濯塵衣

盱江李泰伯和

此臺幽隱傍溪居小小嚴陵一釣磯
天寶詔雖搜逸切
歸官歸服芟荷衣

龍學文集卷六

欽定四庫全書

龍學文集卷七

宋 祖無擇 撰

長書并記書一記九

上安撫張雜端書薦孫復牛仲容

初任齊州通判居官十有

一月作此書

九月十二日承奉郎守大理評事通判齊州軍州兼管
內河堤勸農事偕緋祖無擇謹傾竭愚虞撰書再拜獻

于安撫雜端執事無擇竊謂國家修戎備設民兵雖我朝之新製實前代之遺法若郡若縣其守宰之才者皆足集事今國家擇賢於臺省以為安撫者非直為修戎備設民兵振其綱目而已盡將以察官吏之能否詢民事之利病然後黜陟而更化之也伏惟執事巡按京東一路自宋及齊歷州一十有一矣歷縣約五七十餘矣其民蓋幾百萬家矣某更能某吏否執事固知之矣某事利某事病執事亦固知之矣無擇誠愚而復齟齬奉

所事且不能知其能否者其利病者實無以告執事者
今無擇所知者有二人焉是皆有才而無位一居究之
奉符一居齊之章邱彼二人者常舉進士不幸為有司
所擯於是乎自放於山林間奉符者曰孫復字明復章
邱者曰牛仲容字元色孫復博學敏行有古人風慕孟
軻揚雄氏著書牛仲容博學敏行與孫復比善用兵如
古所謂孫武吳起者觀厥二人之才非今之組繡文字
以為進士者未審執事以無擇之言信邪待將其二人

之學之行而後信邪執事苟求之不惟信夫二人之學之行又將信無擇之言也執事既信之必將行之將行之即當請于天子曰孫復有道者可與之官賜之祿以養於家且旌夫賢曰牛仲容有道者可與之官假之權以臨其戎且伸其用旌夫賢足以厚風俗伸其用足以威夷狄風俗歸厚則王化有成矣夷狄畏威則王師無征矣是進二人而王道具矣執事倘一言而天子從則幸其不從再言之又不從則重言之至于四五六七言

之惟從而後已焉可也茲二人者無擇目識而心知者也若執事所巡按未至數州或有如孫復牛仲容之賢更冀執事留意而博訪之嚮者執事為京東轉運無擇蒙被恩顧實暴傳等今執事安撫京東無擇再獲望拜旌旆心甚喜忭是敢輒稱彼二人之名于左右以備歸朝日為天子諮詢之資不宜無擇僭越惶恐頓首

蔡州新建學記

孔子生中國中國之人帥其教者十一二佛生西方中

國之人帥其教者十八九四海之內儒服而釋行寢以成俗者于今百世而況都邑村落之下橫衣髡首之伍所居如市至使庶民終身不知君臣之義父子之愛師友之禮待其悖逆滯亂之禍生然後寘于刑戮是王道往往而絕也嗚呼不教而殺君子所不為也三代之民馴然以孝悌相養以禮義相守非家至而日見之也學校之化行乎州里也兩漢以降或張或弛何常之有化之不常則民之所守不固所守不固則去而為佛去而

為佛則君雖有政不得臣而使父雖有慈不得子而蓄
師雖有教不得友而接欲其如三代之盛其可得耶今
尚書祠部郎中集賢校理太原王公質以清才卓識為
上器使來長蔡人為北蔡人作新學于孔子廟近市而
陋地且甚狹遷之乃表請郡治前官舍居焉突然而高
者為之講堂次後如講堂者師所仰息翼然而夾于兩
旁者生徒列室而處之又有亭以習射有庫以藏書有
厨以具饌有莊以出粟有圃以樹蔬有什物以備用有

耕牛以墾田使居是學者有求而足也且命軍事推官
楚秦汝陽縣主簿劉丙掌其局事既成公親領僚屬與
其生徒落之蔡人於是知孔子之教非西方佛類皆欲
澡刷前日所為夷狄行靡然胥曰鄉莫不悅懌辱在學
徒乃率其衆拜公之賜遂以是辭刻于石用識所始其
生徒書史屋宇什物莊牛之數籍於學者悉第列于石
陰云時景祐二年秋九月日謹記

京東路轉運使廳名記

昔者西漢漕山東之粟歲數十萬碩厥後又益數百萬
碩以給乎中都故太倉之積相因而紅腐者繇此也今
王京之東海岱之間其是乎國家受天駿命奄宅區夏
析海內為一十七路分命官以司漕運寔兼廉察統理
郡國則漢之八使之權俱焉非夫材如蕭何威如張綱
能豐儲侍而肅奸貪則不與是選我司勳張公郎中工
部馬公郎中領漕運於京東既再稔二公靜惟國朝以
來膺其任者為不少矣皆賢能有材稱去此而入居臺

省毗大政者有矣而爵氏不紀其間也乃追錄前人而次之用刊諸石鄆之名州惟舊某年以河決徙今新州而二公之署在焉今所追錄則斷自徙州而下凡若干人徙州而上者蓋亡矣觀夫羣賢爵氏森然在目未有不稱其任者矧二公之業茂績隆度越羣賢遠甚其將去此而入居臺省毗大政在蚤暮矣重惟二公之懿著於世也不可掩蔽則人或覩此必曰某之言不為所部吏而佞且誣也康定二年夏六月十日記

京東路轉運使廳刻獎諭勅記

獎諭有勅嘉臣勞也金石刻之尊君賜也夏州畔之二
年王師致討未克於是朝廷大臣外及庶官皆思修政
教出籌策幹財幣練士卒協心陳力補綴闕漏以服乎
有罪以基乎無為不敢自暇于位然猶天子念邊警未
撤日乾而夕惕至午而弗食未明而乃衣所以更張洪
化懷來遠人此虞舜格苗周文降崇之修文德也我南
陽張公扶風馬公以尚書郎主邦計於外實居京之東

屬國家有事於西鄙二公夙夜勞躬憂思勤宣精力顧
所職在國用在民隱方今宿兵原野調發良急苟國用
民隱之弗恤於臣節乎何有乃議校貨布經費之贏者
以資乎軍須遂取千萬以獻上以充國之供餽下以紓
民之賦斂天子嘉其然錫以璽書而褒之二公茂對天
子之休命且欲流光無窮非金石刻不永即命某以文
誌焉惟二公之才之任實朝廷之所賴以康也雖然於
二公為小官而尚劬劬以事事如此異日天子擢賢以

輔至治二公並命為公為相必能推是心於天下則其德業銘鐘鼎書竹帛然後納諸宗廟燕之勲室以昭示後世某猶期為二公稱述茲敢不承命哉謹拜手稽首恭篆其辭于壘書之下云

申申堂記

申申堂者所以備燕息也無擇官于齊之六月郡政之暇思得賓客之有道者與之書而學政焉乃度地作堂以延賓客得隙地于寢室之後遂樹垣作限而構堂焉

制不侈大亦不卑陋俯砌鑿二方池導回泉水以灌其中
匝岸植雜花果樹間以怪石植藕于池池之東舊有竹
數本又徙數十本益之成叢既而賓客每至則引於此
著古今之治亂評人物之是非有不學古而能通時事
者亦見之以諮詢其利病焉或公退客去惟看書賦詩以
為燕息之事若夫坐於堂上則有連峯在目鳴泉入耳
時時觀魚之洄聞鳥之嘯竊感魚鳥之樂幾動林壑之戀
此其燕息之趣也居是官十有九月天子有詔

俾三十日而後歸朝惜夫將去此也因書其始作且誌其物或曰子名燕息之堂曰申申非取孔子燕居之義乎無擇對曰然書不云乎惟狂克念作聖若無擇其不為狂者耶斯亦克念矣恐後來君子未之知我以茲為過故以其說附諸康定元年夏五月二十有五日記

知雄堂記

君子之為道也夙夜皇皇不敢懈惰蘄至於聖且賢也苟至矣又將蘄其所施焉耳為所施惟勤而克著大休

顧內充于厥躬外及于斯民光永于來世其或懈於其始而光且有終者末也蘭陵蕭君濬夙夜為道有君子之心焉雖內充于厥躬而猶蘄其所施故惟卑以處之若未有以過人者豈不幾乎賢哉寶元己卯春以將作丞為齊臨邑明年新故堂於其聽事之左堂故無名遂名之曰知雄在老氏曰知其雄守其雌雄取大雌取小知其大守其小則實之者虛滿之不損孔子所謂若聖與仁則吾豈敢又曰吾非生而知之者好古敏以求之

是矣惟君能知道之大守道之小故取老氏說以名其堂蓋將與道出處不忘乎知之守之之義也他日其獲用於朝廷施厥所為以外及于斯民光永來世信夫道之雄也厥惟君之志是誠君子之心焉臨邑於予為屬予乃知君也詳後之來者其尚繼蕭君之志夙夜為道而又知其大守其小則聖且賢可漸而至焉也苟不以其道而曰吾不為雄而為雌不為大而為小必也懦夫者已未可與言乎知雄之有也

郴州學記

時為廣南東
路轉運使

皇祐五年七月郴州新作夫子廟學成太守陳君藻移書俾無擇識其始夫惟聖人者人道之規矩學者王化之本原人道非規矩不成王化非本原不立我國家因唐制天下州縣置夫子廟與學用古道也郴於湘南介要荒之地向之為州者往往陋其俗而不教之使知其方故舊祠圯毀而絃誦之音未之聞焉前年陳君通判是州與太守李君初平始謀撤故而新之因上其事朝

廷嘉之賜錢三十萬以助其費用承制再拜喜忭黃髮
稚齒莫不聞知明天子崇儒尊道之如此闔境歡聲蒸
為太和衆工效能曉昏勗勗事以亟集謀雖肇于李而
成功者陳也其制宏敞尊顯為一州壯觀偶夫子與十
哲于殿者王若公若侯各視其冕服圖六十子于廡皆
有次序儼然如攝乎威儀儼然如聞乎聲音左之右之
有經有史學者有能用力於斯不懈可以變冥為昭言
具齊聖陳君之是舉也郴人戴其德曷有窮乎矧君之

自通判遷知州事凡四年矣惠恩入民心也深矣金石
之刻以詒後人無擇不宜辭乃系以詩云天下有道兮
庶人不議王澤旁流兮海隅萬里化莫先兮吾儒崛起
德莫盛兮斯文遐被惟柳之人兮亦材而美可掾為轅
兮可矯為矢孰絕其津兮孰梗其隧今我邦侯兮戚然
以喟興墜補漏兮靡艱厥為廟學既成兮不愆舊儀生
徒既集兮率用新規勤道在己兮廣業及時入聖之域
兮為帝之師無曰苟取富貴兮內以自欺遺我邦侯之

羞兮汝顏曷施誰踵其武兮善繼勿墮惟柳之人兮無
忘此詩

袁州慶豐堂記

予去年春正月自廣南東路徙荆湖北路皆為提點刑
獄秋七月按部道次鼎州奉詔改廣南東路轉運使時
廣源州蠻入寇陷嶺外數州朝廷趨行乘遽日馳二百
里浹辰而達所治遠方久無事戎備既寡糧餉不給賊
氣方銳我師屢敗予不量力亦提羸兵迫躡其後遂出

境外未幾以罪移典此州其始至也見城郭井邑在迤
邐衆山之間如圖畫屏障使人清趣自生俗慮都去郡
僻務簡居多暇日小寢西有地一畝餘荒穢無人跡命
冀除之為堂以休焉公退則擁書隱几而坐考聖賢之
事業以自廣間或速賓友以琴尊相歡因謂坐客曰昔
也委妻子而去履山川之險見危致命可謂勞矣今也
乃無秩有祿飽食終日不亦泰乎人雖以為貶予不以
為貶也顧無以報陛下之德為憂耳是秋禾大熟百姓

足食上下莫不悅懌乃名其堂曰慶豐且持其說私自賀焉皇祐五年十月二十日記

唐韓文公廟記

元和十五年昌黎韓文公嘗為袁州刺史後二百三十四年無擇實蒞此州築宮而祠之公諱愈字退之幼孤見鞠於兄嫂氏嫂卒服期喪以報德進士及第應董晉張建封辟為汴徐二府從事入為國子博士監察御史關中大旱民死盈路公請寬征復租幸臣切齒貶連州

陽山縣令在陽山有善政既去人懷其惠生子悉以韓
名繇江陵府法曹叅軍再為博士避謗分司東都遷尚
書都官員外郎判祠部僧之無良者一切寘于理用是
復力穡者衆改河南縣令將發魏鄆幽鎮留卽亡卒民
恐禁示歷職方及比部考功郎中史館修撰知制誥初
議計吳元濟朝廷文武大臣無敢言者公以為宰相被
殺中丞傷僅免若是兵可息乎及裴度出征公以太子
右庶子為行軍司馬先馳至汴說韓都統名紀宣祖廟諱上一年改

書其言韓輿疾以從蔡州平公謂度曰王承宗可取乃授

書栢耆以往承宗即獻德棣二州轉刑部侍郎佛骨至
自鳳翔百姓大饑膚為奉供京師公上疏極其不可因
得辜貶潮州刺史近境有鱷魚食人公以文逐之魚輒
遠去人用無患移刺袁州袁州之民男女為人隸者踰
約則沒不得出公皆計傭子有而出之循奏而著於令
拜國子祭酒接學官儒生必以禮除兵部侍郎鎮州亂
殺其帥署王廷湊為節度詔公宣撫既行穆宗遽止之

公已入矣衆皆危公公辭氣慷慨如蹈無人之境與士卒論逆順存亡之理莫不聽命解深州圍歸牛元翼以吏部侍郎典選聽令史出入令史之勢遂輕任京兆尹六軍將士咸畏憚帖怙不敢犯曰是欲燒佛骨者其為人信服也如此憲宗既貶公於潮且將復用之為皇甫鎛所忌乃以公為狂疎止可量移一郡故有袁州之命公自鎮州還穆宗即欲相之會京兆尹以不治聞乃擢公兼御史大夫有敕無臺叅中丞李紳繇是不協復為

吏部侍郎卒贈禮部尚書嗚呼公之器業可謂宏深魁偉施於行事細大夷險無所不宜其文章博辨卓詭與商盤周誥相上下惜也孔子沒無聖人者為之章顯以信後世而見絀於史臣之筆其亦不幸也歟無擇何人哉道不知修學不加益夙夜茂勉庶幾前烈謹詳書其實以著于記云時皇祐三年冬十一月一日也

袁州東湖記

袁城之東有湖焉上有四亭興自近歲厥後為州者老

昏不事事湖亭用不治以荒初予至州日其處不及往者三月既而吏曹務簡登城而觀水雖盈而甚汚屋雖存而將傾延議葺之且官無羨財苟賊於民則予不為也閱封內之浮屠民多藏者籍其餘什之一募匠購財一皆新之別為堂亭臺閣互植以珍木嘉果間以奇卉幽草紅葉綠荷雜襲波上於是游者日往焉予樂州人之觀遊是好遂署其中堂曰樂游其東堂曰廉循厓之南其亭曰休因城之高其臺曰月抗水而榭曰采香閣

為庖厨二以供賓客舊亭四皆無名亦名之在樂游之
西者曰遜堂堂壯有射礪南有石高丈餘奇秀可愛實
自盧肇故宅徙焉背城而東向者曰采珠閣閣後有石
亦惟舊廉與遜采香采珠皆東西相值據城之隅者曰
銷暑亭與月臺相屬而差小者曰風亭其浮有航其絕
有梁其登有磴道其周有繚牆南北其門後溪前市山
煙水風淵魚林鳥明滅虛徐浮沉下上眺聽之際可以
釋幽鬱可以道和粹予以公事不得數自放于其間月

或一至再至蓋稀矣予猶以為數也越二年新太守在道予行有日矣因置酒為會同僚舉觴屬予曰湖亭雖舊而增廣之以至大備者非君而誰不可以不聞於後盡文而刻諸金石乎予曰池館之作耳目之娛非政之急何足道哉然此州自江以西最然窮處故朝廷往往以有罪者居之予即其人也或終年不逢王人出於其塗非數君子相與樂此予何以久處乎後之踵予武者其以才選而來厥職是宜政成民和能無燕

嬉之事歟若以辜譴而來又宜有登覽之美庶幾忘遷
謫之累焉繇是而言則茲境也當不廢矣奚取於予文
如欲識其歲時請以斯言刻之至和二年冬十月一日
洛陽祖無擇記

龍學文集卷七

欽定四庫全書

龍學文集卷八

宋 祖無擇 撰

序七篇

刻經效方序

洪範九疇皆以天時人事本於王化其九曰嚮用五福
威用六極壽康寧考終命居福之三凶短折疾居極之
二苟陰陽和寒暑時兵革不起畫象不犯則民壽康寧

且考終命矣三代之際仁政之行非他也繇是道也風雨不時人多疾疫邇鄙不寧刑罰不中則民凶短折且疾矣暴秦之際覆亡不暇非他也亦繇是道也噫為天下國家者舍三代而不務則必暴君也污吏也未見其仁政所由興也求今之人能繇是道以行仁政其提刑舍人彭城劉公乎公明白有材遇事輒斷奸貪下吏縮縮不敢動如老婢病妾對明鑑然常自謂曰陰陽和寒暑時兵革不起畫象不犯使民壽康寧且考終命者此

宰相佐天子之職之業我則不敢然念四海之廣民踰
億兆飲食之失飪寒暄之作沴為不少矣非有藥石之
良孰救腹心之疾因取家藏方書所經效者總三百七
十首且將刻石傳諸方來即出其本以示小子小子再
拜拜賜不覺歎服公之用心可謂有仁術矣往者太宗
皇帝集聖聖惠方凡萬餘首鏤之方板以廣流布今上
皇帝作銅人象按明堂法分布腠空示民不惑以我國
家四聖人豐功鉅德紹休天命永康民人仁政之行固

已比隆于三代也尚慮和氣或鬱人乘為疹乃以藥餌
之方鍼砭之法輔世所闕斯又過於禹湯文武之心焉
公則靡愛斯術用濟羣品有以見聖主賢臣同德協心
如此其至矣異日朝廷訪公以天下之利害民間之疾
苦公又將以仁義之藥禮樂之術醫時之病使鰥寡孤
獨有養黎民不飢寒至于海隅蒼生或仁或壽其為美
利萬萬於茲也小子不敏辱命為序區區之說願冠諸
首

羣公送潘君秘校赴潁上詩序

去年余遊上都隸太學會友人芸閣讎書潘君說自七
鬪赴三銓余以秋賦獲升名於禮部君以冬集勾稽於
潁上既而離羣索居望風懷想者三十旬于茲矣今余
抵潁謁舊叅政貳卿蔡公屬君趨府且同傳食胥會于
此馭慰無量君乃出去年所得餞行詩繇內相晁公而
下暨予一十九人凡二十章其將籍不肖文以冠諸首
而刻諸石請不容遜可無辭乎君少步塲屋為時聞人

沉此下僚固未充量而君累歲處之無一日戚戚于懷
抱如居貴仕享豐祿之為者事上官不少懈亦未嘗以
毛髮事取容於人非夫器之閎大塗之修遠尚不可涯
測則疇能如是耶貳卿蔡公以元老舊德暫解魁柄息
偃是藩薦紳之士延脰翹踵以覬獎拔矧如君者孰與
先焉余知君之脫塵土凌煙雲當在此時不在異日必
矣敢請題是辭于羣公之詩左以為序時景祐五年秋

九月十日也

是年十一月十八
日改寶元元年

河南穆公集序

積于中者之謂道發于外者之謂文有道有文然後可
以為君子道有用舍文有否泰然用舍否泰在命不在
道與文也君子不以其命之窮而輟于為道道之不行
而不廢于學文故雖身厄于當時而名顯于後世者繇
此也河南穆公諱修字伯長天平人少舉進士有名廣
場中真宗封泰山之年詔齊魯諸生以經明行修公實
在其選越三年就銓調補泰州司理叅軍居職以直自

任無與合者人皆憚忌卒誣之罪遂貶池州再逢恩徒
潁蔡二州為文學掾卒不復用明道元年秋九月終于
家如公可謂命之窮道之不行也已而未嘗廢文大凡
有作莫不要諸聖賢而立言合諸仁義以為質平時所
見於簡策者殆踰數千萬言時人得之且愛且學及公
之歿無擇求遺文於嗣子熙得詩五十六書序記誌祭
文總二十與無擇所藏增多詩一十二書序各一又從
其舊友而求之往往知愛而不知傳故無獲焉姑類次

是以為三卷題曰河南穆公集云時慶歷三年春南康清修閣中序

李泰伯退居類彙序

孔子沒千有餘祀斯文衰敝其間作者孟軻荀卿賈誼董仲舒揚雄王通之徒異代相望而不能興衰揀敝者位不得而志不行也苟得位以行其志則三代之風吾知其必復嗟乎秦漢以來禮樂則不為而任刑以毆其民將納於治適所以亂之也歷世寢久皆謂天下當如

是可以致治而不治者時耳故有奮筆舌為章句卒不
及于禮樂者末哉文也盱江李泰伯其有孟軻氏六君
子之深心焉年少志大常憤疾斯文衰敝曰墜地已甚
誰其拯之於是夙夜討論文武周公孔子之遺文舊制
兼明乎當世之務悉著于篇且又歎曰生處僻遐不自
進孰進哉因徒步二千里入京師以文求通于天子乃
舉茂材異等得召第一既而試于有司有司黜之嗚呼
豈有司之過耶其泰伯之命耶或者天徒付泰伯以其

文而命則否耶亦將謂得志行後有時耶吾不得而知
已泰伯退居之明年類其文藁第為十有二卷以寄南
康祖無擇且屬為序無擇既授之讀之期月不休善乎
文武功公孔子之遺文舊制與夫當世之務言之備矣
務學君子可不景行於斯慶歷三年冬至日序

連席秀才字序

名之於身必存乎義無義不足以為名故字者所以明
乎義之所存也夫春秋之法書字者貴之也書之為貴

則不書者賤可知矣噫字之用亦大矣古之人名而不字者有矣字而不主乎名者有矣苟名與字存乎義甚大而人不有其道又何所取焉上黨連君學賢人者也學賢人者將有為也將有為則其思慮深其志意廣精驚乎堯舜之道思慮不得不深心入乎堯舜之道志意不得不廣連君學賢人勤且久而不渝其心允乎賢人也其名席席之義亦大昔魯哀公問儒於孔子孔子曰儒有席上之珍以待聘鄭氏謂席猶鋪陳也鋪陳往古

堯舜之善道以待見問也夫堯舜之道存乎典蓋百王之所不可易之法也人苟能得其道而鋪陳之以事其君不亦孔子之心乎今連君之名席豈無意哉無擇敢請字之曰公珍惟公珍有可為之材當可為之時又將居可為之位必能鋪陳善道以事其君亦朋友有望於公珍也公珍其勉諸

進士魏舜元字序

男子冠而不字可以謂之闕禮予之友弟魏君舜元一

日訪予以未字為請且懼其闕禮夫父名其子士字其友時乃古予不敢遜因稽其名所出循其義以取稱之字曰善長在春秋傳舜有大功二十而為天子蓋言舉十六相去四凶人也易稱乾有四德元亨利貞文言謂元者善之長也在坤則曰坤元亨利牝馬之貞用知乾有四德坤亦有之乾言君坤曰臣君臣之間皆備四德舉十六相世濟其美天下之人謂之元凱其不善乎臣於堯舜非坤道乎第以少年彊學篤作進之心苟道日

並修志日益固何患夫不為元凱也何患夫不為明天
子之舉也孟子不云乎舜何人也予何人也舜而可及
元凱其不可及乎第其勉之孟子又曰責善者朋友之
道也予既辱來請且訊其舜之功又緣其坤之德重以
孟子之言并而為序以畢其說不褒而勉者亦庶幾乎
責善之道焉

題宜春臺詩序

宜春郡有五臺號宜春者為甲蓋其據會要盡登眺之

樂自古迄今幾千百年遊於斯者幾千百人好事之流
覽景而賦詩者豈少耶今存於屋壁者不過近世三四
十人而已余意經久失其傳爾乃因暇日命工為巨版
總錄其詩凡三十首庶免散亡不以詞之妍媸不以位
之高卑惟以歲月次其先後或曰子其刪之如何余應
之曰非聖人之徒不敢爾為也請俟來者

龍學文集卷八

欽定四庫全書

龍學文集卷九

宋 祖無擇 撰

書并神道碑銘墓表

與張郎中書

月日范陽祖無擇謹致書于郎中執事無擇中間嘗奉
面命俾譔先正侍郎神道碑文初不敢承命暨執事改
治洺州又辱書來請伏以先正侍郎潛德弗耀克昌其

家無擇才學短淺固不能發明往行然屢被見託不可
無辭以慰孝思其碑今已撰成謹令繕寫寄獻文字荒
謬深懼不稱伏惟尊明詳擇不宣

宋故贈尚書工部侍郎清河張君神道碑銘

寶元元年冬十一月庚戌天子有事于南郊還乃賞公
卿行慶賜自公以下位于朝者其父母祖父母既歿咸
有贈官例也明年春知齊州軍州事尚書虞部郎中張
公某語其僚大理評事祖無擇曰我先正本無官某治

毛鄭詩咸平三年擢第自有位于朝乃贈為衛尉卿今
天子以園丘之祀均釐臣庶又贈至尚書工部侍郎按
令當斷石為碑表諸神道願得文章以系以銘無擇曰
不敏文章不足以信後人敢辭他日見之復言無擇曰
此譔述之事非末學所宜為因固辭未幾公改治洺州
又移書來請益堅無擇大懼違孝子之心有咎乃不敢
辭其碑曰惟張氏先寶皇帝所自出其苗裔蕃衍甚盛
漢晉暨唐有文武材為王侯公卿大夫十五六唐末五

代天下喪亂衣冠舊族多流落閭閻沒而不振故侍郎諸祖咸夷于民曾祖諱瓌祖諱溫父諱隱以中原版蕩與其族轉徙四方無常產逮周廣順中始占籍于濟侍郎諱澄字仲容實濟人也侍郎以諸祖連數十歲避難南北為其餘貲無以支經費遂不為他務惟蚤夜孜孜以治生事常自儉嗇推所有以均其宗屬歷數年為富家大族嘗有里中凶人晝日輒搶物侍郎不畀人捕焉俄而凶人自致其所盜物而去濟民於是號有善行

初郎中君以明經中選侍郎訓于庭曰汝惟清謹乃克保厥官汝惟反是乃用鰥厥躬郎中君祈服其誨言罔敢失墜繇州縣職為幕府客遷京朝官宰邑守郡時稱廉平故人咸謂張氏有子矣侍郎之配曰太原王氏積封寧晉縣太君生六男四女男長即郎中君也次曰永圖曰永昌曰永錫曰永肩曰瑋並無祿早世女俱嫁為仕妻侍郎以咸平五年秋八月終以明道元年秋八月葬于濟之鉅野縣仁義鄉仁義里以寶元二年秋八月

作碑于道固自一命大理評事暨今尚書工部侍郎凡六被贈典也於是條其世係官閥以狀來請辭刻于石
辭曰

東京陳氏著于潁川世莫不聞太丘之賢降及千載孰纂其先君曾祖考奕世服道樂只丘園不易其操涵淳淵深後必浩浩至君起家存謙有華郎署卿曹爵服載加周旋四紀靡有過差于沂于并于新于撫若泗興國別乘守土王澤是宣及爾黎庶聽訟由人下無冤民發

姦摘伏異如明神折強扶弱愛如陽春七十致政雖曰
禮典卿士大夫由之蓋鮮惟君知止聖言是踐昔學而
仕車朱兩轡盡歸乎來棲遲衡門始終進退身歿名存
咨爾來世欽此遺懿鄉黨善人朝廷循吏石有時泐斯
文不墜

鄭都官墓表

予既作韓文公祠成因畫都官郎中滎陽鄭公像于東
壁以配未幾郡人之戴白者以公墓所在來告乃率僚

屬丞往觀之距城纔七里而獲焉於是增封與樹植宇
隧前周以垣墉限以閑閤伐石為碣表于路隅公名谷
字愚袁州宜春人光啟三年進士及第始為宣德節度
判官不行以所知薦擢為殿中丞遷國子博士尚書虞
比駕部員外郎中司農少卿歷知南京下邑縣廬州舒
城江陵府江陵邛州大邑縣通判沂并州知新撫泗州
監光州酒稅知興國軍始為郡掾留心法律嘗言五服
年月之制輕重之失凡九條請行刊正文信五代之法

有自徒加至死者亦請減定並從之赴調吏部以書判
高等遂佐江陵幕時府政尚威猛僚吏無敢言者君頗
為規正一府賴焉君在舒城主推茶薈有大姓張廸等
五家常擅其利他商莫能行君為革其敝廸等乃誣搆
訟君於上在法當免轉運使察其非罪聞于朝乃得其
直廸等皆黥配焉治江陵有善政後有徐越者代君為
治亦著能名時人歌曰前陳後徐政簡民舒民到于今
稱之有沂州殺人者及得無辜而按之會君被檄如齊

未幾而已具獄君立辨其寃後果得殺人者人以為神明樞密直學士王公雅聞君名及守太原辟以為僚至則一府之事多以委之春州有馬萬者殺人辭連馮資既而吏鬻獄將以資死焉君方為新州轉運使乃以屬君繇是資得不死撫民素好訟君下車三日牒訴數百一一照其情偽區處無有不當訟是用希泗當水陸之會政事實繁君處之沛若有餘刃皇祐中諸路轉運使承詔上列郡治狀而君在淮南為第一踰年拜章懇求

近鄉一閑局以便於私宰再上乃有光州之役俄為使者奏起之復知興國軍大江以西其俗尚鬼君一切禁止民遂化之居二年請老既得謝歸故里一不問家事惟與同縣人高士劉瞻相往來講道義泊如也以嘉祐六年十月十四日啟手足于私第享年七十有三君少時孝謹諸父有欲異居者為之泣諫乃止丁繼母憂廬墓三年極於哀毀其蒞官效職廉白明恕數見稱述若文潞公明文烈公高文華公皆引重焉曾祖隱祖懷懿

並不仕治左氏春秋世其學父谷不仕累贈尚書工部
侍郎妣李氏張氏梁氏封壽光僊遊縣源太君君三娶
初黃氏次程氏後許氏皆望族也程許封長壽天興縣
君男八人之翰之奇之才之純之敏之道之輔之賢翰
撫州司戶叅軍奇宿州臨漁縣主簿純蘄縣主簿才不
幸早世餘皆舉進士女四人伯叔並夭仲季嫁為士妻
孫十一人曾孫二十二人君既有疾一日謂諸子曰吾
疾草矣吾死當乞文於祖擇之以識丘壠則瞑目無恨

馬諸子以熙寧元年四月二十日塋君及三夫人于蔡之新蔡縣咸平鄉龍泉里從吉卜京兆府劇縣尉終以尚書都官郎中老於鄉嘗作拾遺補闕當時正人多稱其善尤工五七言詩為薛能大拙所有雲臺編與外集凡四百篇至今行焉士大夫家暨委巷間教授兒童咸以公詩與六甲相先後蓋取諸辭章清婉明白不狎不野故然嗚呼人患不學學患不至苟至矣雖小善必聞古之賢師日者之類有能臻其極猶或不磨滅於後世

矧詩者吾聖人之門六藝之一乎宜乎公之名與詩俱存也予觀今袁人服儒而忘古者誠不少矣他日卓然以文章功業與前人並駕則誰歟予是舉也將以勉其所未至耳墓在宜春縣信義鄉仁成里至和元年冬十二月五日記

祭故鄆州孔給事文

維寶元二年歲次己卯閏十二月丁亥朔十日丙申承奉郎守大理評事通判齊州軍州兼管內河堤勸農事

借緋祖無擇謹以清酌庶羞之奠致祭于故鄆州給事
孔公之靈嗚呼直如絃死道邇昔聞其語今見公嗚嗚
呼公乎秉德自天其道甚大動直靜專惟我素王實公
遠祖王之四科方冊攸布公能兼之用濟近著克孝于
親克忠于君德行以聞再使絕域時謂稱職言語維則
五為州牧務簡刑肅政事有穆好古博雅不舍晝夜文
學是篤公以謹言得官諫垣孜孜獻替袞闕以完中間
左遷廼于蕃宣帝思其賢趣召次旋復位于朝丞我御

史表正中外有綱有紀有議于廷惟公固爭遂被斥逐
去如流萍守徐暨究歲華五變又詔俾歸舊職是踐厥
惟宵人實文通臣訟起王府迹狀誠陳公按其獄細大
必親投鼠忌器有惻上仁巧言如簧茲用中傷朝奪其
官夕與汶陽道次澶州館舍以捐聞諸行路失聲潛然
靈輟東歸闕里故第寓殯于郊茲辰維利敢陳薄奠以
致精意公其鑒之尚或來暨嗚呼哀哉伏惟尚饗

龍學文集卷九